

sa basond sin l'art. 44 al. 3 da la lescha chantunala da chatscha¹ e sin l'art. 33 al. 3 da la lescha chantunala da pestga²

relaschada da la regenza ils 22 d'october 2007

I. Champ d'applicaziun ed organisaziun

Art. 1 Champ d'applicaziun, dretg subsidiar

¹ Questa ordinaziun vala per ils organs da surveglianza da chatscha e da pestga tenor l'artitgel 44 alinea 1 literas a fin c da la lescha chantunala da chatscha³ e tenor l'artitgel 33 alinea 1 literas a fin c da la lescha chantunala da pestga⁴.

² Uschenavant che questa ordinaziun u che las decisiuns e las disposiziuns che sa basan sin ella na disponan betg autramain, valan las disposiziuns da la lescha chantunala dal persunal per la relaziun da lavur dals organs da surveglianza da chatscha e pestga.

Art. 2 Organisaziun

1. districts da chatscha e da pestga, circuls da surveglianza

¹ Il chantun cumpiglia districts da chatscha e districts da pestga. Quests districts èn sutdividids en circuls da surveglianza.

² Mintga district da chatscha vegn manà d'ina scheffa districtuala u d'in schef districtual da las guardiaselvaschina e dals guardiaselvaschina e mintga district da pestga d'ina survegliadra da pestga principala u d'in survegliader da pestga principal.

³ Mintga guardiaselvaschina u mintga survegliadra respectivamain mintga survegliader da chatscha e da pestga s'occupa per regla d'in circol da surveglianza.

Art. 3 2. direcziun, superiuras tecnicas-professionalas e superiurs tecnic-professionals

¹ La scheffa districtuala u il schef districtual da las guardiaselvaschina e dals guardiaselvaschina è responsabel per la direcziun da las guardiaselvaschina e dals guardiaselvaschina sco er da las survegliadras e dals survegliaders da chatscha e da pestga ch'èn suttames ad el.

² Tar dumondas da pestga maina la survegliadra da pestga principala u il survegliader da pestga principal tecnicamain e professionalmain las survegliadras ed ils survegliaders da chatscha e da pestga.

II. Relaziun da lavur

Art. 4 Surveglianza, meds auxiliars

¹ La surveglianza dals organs da chatscha e da pestga è chausa da la scheffa u dal schef da l'uffizi da chatscha e pestga. La scheffa u il schef da l'uffizi da chatscha e pestga è autorisà da dar las ordinaziuns organisatoricas necessarias sco er da relaschar las directives tecnicas-professionalas ed administrativas.

² La scheffa u il schef conceda als organs da chatscha e da pestga las permissiuns excepziunalas ch'èn necessarias per duvrar meds auxiliars scumandads.

Art. 5 Premissas per l'elecziun

Per l'elecziun sco organ da surveglianza da chatscha e da pestga vegnan per regla fatgas las suandantas pretensiuns:

- a) ina buna reputaziun;
- b) in emprendissadi terminà;
- c) in bun stadi da la sanadad (alpinista u alpinist, skiunza u skiunz, tiradura u tiradur e nudadra u nudader);
- d) experientscha pratica sco chatschadra e pestgadra u sco chatschader e pestgader;
- e) in bun dun d'observaziun;
- f) permiss da manischar da la categoria B.

Art. 6 Temp da lavur

Il temp da lavur regular per onn vegn fixà da l'uffizi da chatscha e pestga en cunvegientscha cun l'uffizi da persunal e

d'organisaziun.

Art. 7 Locals da lavur

¹ L'uffizi da chatscha e pestga designescha las collavuraturas ed ils collavuraturs che ston metter a disposiziun locals da lavur adattads per liquidar las lavurs administrativas.

² Las guardiaselvaschinas ed ils guardiaselvaschinas sco er las survegliadras ed ils survegliaders da chatscha e da pestga ston procurar per localitads adattadas, en las qualas la selvaschina po vegnir examinada, mesirada, pasada e scurtgada. L'uffizi da chatscha e pestga definescha las pretensiuns minimalas per questas localitads.

Art. 8 Ir a chatscha ed a pestga

¹ A las guardiaselvaschinas ed als guardiaselvaschinas sco er a las survegliadras ed als survegliaders da chatscha e da pestga èsi scumandà d'ir a chatscha. Exceptadas da quai èn la chatscha da guetta e la chatscha cun traplas. Questas chatschas dastgan vegnir pratitgadas ordaifer il temp da servetsch.

² A las survegliadras da pestga principalas ed als survegliaders da pestga principals èsi scumandà d'ir a pestga. Davart las excepziuns decida la scheffa u il schef da l'uffizi da chatscha e pestga.

Art. 9 Indemnisaziun da las spensas

L'indemnisaziun da las spensas po vegnir fatga totalmain u parzialmain sco indemnisaziun pauschala. Las tariffas correspondentas vegnan fixadas dal departament da construcziun, traffic e selvicultura suenter avair tatlà l'uffizi da persunal e d'organisaziun.

III. Diever da l'arma da fieu

Art. 10 Servetsch cun l'arma 1. princip

Ils organs da surveglianza da chatscha ston per regla purtar cun sai in'arma sin lur turas da controlla. Els dastgan duvrar questa arma en il rom da lur obligaziuns da servetsch.

Art. 11 2. diever da l'arma da fieu cunter persunas

¹ Il diever d'armas da fieu cunter persunas è admess mo pli a norma da l'artitgel 25 da la lescha da polizia ⁵ dal chantun Grischun.

² Sch'i vegnan duvradas armas da fieu cunter persunas, sto quai vegnir annunzià immediatamain a l'uffizi da chatscha e pestga ed a la polizia chantunala.

IV. Disposiziuns finalas

Art. 12 Aboliziun dal dretg vertent

Il reglament da servetsch e d'organisaziun per ils organs chantunals da surveglianza da chatscha e da pestga dals 4 da fanadur 1995 ⁶ vegn abolì.

Art. 13 Entrada en vigur

Questa ordinaziun entra en vigur il 1. da december 2007.

annotaziun finala

1 DG 740.000

2 DG 760.100

3 DG 740.000

4 DG 760.100

5 DG 613.000

6 CUL 1995, 3375 e midadas tenor CUL 2001 en il FUC 2001_4288